

671.1431
078
14

永年縣志

胡景桂題籤

永年縣志卷二十四

知縣事江陰夏詒鈺續纂

兵事錄

永年自春秋下逮元明號爲用武之地羯石亂晉肘腋
僞都藩鎮拒唐屏蔽河北隋運告終竇建德且憑據以
竊大號金元之際兵爭尤亟迄今流連遺壘亦足慨劫
灰于昆明發浩歎于廣武矣舊志有武功紀傳體例殊
舛如唐太宗世系及虎牢之戰查于本邑無涉而本境
兵事則又散見他卷茲各爲釐正並附近年軍興守疆
固圍之制俾後來者有所考焉

春秋宣公十五年六月癸卯晉荀林父敗赤狄于曲梁
辛亥滅潞酆舒奔衛衛人歸諸晉晉人殺之

晉太興三年劉曜左中郎將宋始振威宋恕降于石勒
遣石生馳應始等軍勢甚盛劉曜將趙慎以洛陽降

石勒進據襄國張賓獻計曰今我都此越石彭祖之所

忌也

劉琨字越石
王浚字彭祖

恐及吾城池未固資儲未廣送死于

我聞廣平諸縣秋稼大成可分遣諸將攻掠野穀勒然
之

太元十年劉牢之追慕容垂自鄴二百里及于五橋澤

舊志澤在城南綱目質實五橋澤在開封府陳州西南
一十五里澤有五橋因各一名五梁溝考鄴在今臨漳

垂自鄴北趨中山陳在鄴南又數倍于二百里永年在鄴北道里于二百里亦不大謬而舊志所謂牢之追垂之地卽此者亦必有所據也

唐武德二年八月甲子竇建德陷洛州執總管袁子幹遂由河間遷都焉築萬春宮居之始建天子旌旗建元五鳳置百官隨才授任委以政事在洛州勸課農桑境內無盜商旅野宿四年率衆援王世充與唐戰被擒斬長安市建德妻與其左僕射齊善行以騎數百遁還洛州餘黨欲立其養子爲主善行曰夏王奄定河朔號爲威彊今一出不復非天命有歸哉不如委心請命無爲塗炭生民也乃與官屬及建德妻奉山東地并傳國入

璽降唐

武德四年七月竇建德故將劉黑闥起兵漳南建德諸將高雅賢王小胡家在洺州苦唐官吏法嚴欲竊其家以逃官吏捕之亡命至貝州會詔徵范願董康買曹湛及雅賢等于是聚謀作亂奉黑闥爲主事聞唐置山東道行臺尙書省于洺州以淮安王神通爲行臺僕射發邢洺等州兵合五萬餘人與黑闥戰敗於饒陽李世勣棄宗城退保洺州黑闥追擊破之洺州土豪翻城應黑闥刺史陳君賓遁走黑闥築壇于城東南告天祭建德而後入五年自稱漢東王建元天造定都洺州聞幽州

總管李藝將至留兵萬人使范願守洺州自將兵拒藝
永安令程名振載鼓六十具於城西堤上急擊之城中
地皆震動范願驚懼馳告黑闥黑闥遽還遣兵與藝戰
大敗會秦王復拔洺水與李藝營于水南黑闥數挑戰
堅壁不應別遣奇兵絕黑闥糧道相持六十餘日秦王
度賊糧盡必來決戰乃使人堰洺水上流黑闥果帥步
騎二萬南度洺水壓唐營而陳自午至昏戰數合黑闥
勢不能支先遁餘衆猶格戰守吏決堰水大至衆遂潰
黑闥奔突厥山東平六月黑闥復引突厥入寇淮陽王
道元敗沒廬江王瑗棄洺州走河北復叛歸賊黑闥仍

都洛州皇太子建成與戰館陶黑闥大敗李藝亦以兵

會洛州黑闥走至饒陽爲守將執送唐斬之

永寧舊唐書作永年

天寶十四載常山太守顏杲卿起兵討安祿山傳檄河北于是廣平諸郡並斬僞刺史傳首常山十五年賊將史思明自常山復陷廣平九郡

寶應元年以雍王适爲天下兵馬元帥討史朝義大敗之賊將薛嵩以相衛洛邢四州降

大厯十年田承嗣反陷洛衛州

建中二年田悅舉兵寇邢洛悅與李正己李惟岳定計連兵拒命悅欲阻山爲境乃遣康愔圍邢州自將兵數

萬圍臨洺築重城絕內外援臨洺將張仵固守累月不拔城中食且盡仵飾其愛女使出拜將士曰諸軍戰守甚苦仵家無他物請鬻此女爲將士一日之費衆皆哭願盡死力詔馬燧李抱真及神策兵馬使李晟將兵討

悅次邯鄲悅使大將楊朝光以兵萬人據雙岡

在縣西俗呼兩

頭岡築東西二柵以禦燧燧率軍營二壘間是夜東壘遁

燧進營狗明山取棄壘置輜重悅計曰朝光堅柵且萬人雖燧能攻未可以數日下且殺傷必衆則吾已拔臨洺饗士以戰必勝術也乃分恒州兵五千助朝光燧令大將李自良等以騎兵守雙岡戒曰令悅得過者斬乃

推火車焚朝光柵自晨及晡急擊大破之斬朝光擒其
將盧子昌居五日進軍臨洛悅悉軍戰燧自以銳士當
之凡百餘反士皆決死悅大敗斬首萬級俘係千餘悅
夜遁三年正月燧等復大破悅于洹水悅兄昂以洛州
降

建中四年李抱真自魏縣退屯臨洛田悅王武俊寇臨
洛抱真遣賈林說武俊曰臨洛兵精而有備未易輕也
今戰勝得地則利歸魏博不勝則恒冀大傷且易定滄
州皆大夫之故地也不如先取之武俊乃辭悅北歸

興元元年李抱真自臨洛引兵會王武俊救貝魏州與

朱滔戰大破之

司馬元誼據洺州叛王虔休遣將李庭芝討之戰長橋

橋在縣東

南十二里

會昌三年昭義節度使劉從諫薨其子稹自爲留後李德裕勸帝討之敕何敬容取洺州稹年少懦弱將士有功無賞人心離怨王釗守洺州給士帑布一端稹檄代歲粟釗謂衆曰庫物尙多發以爲賞可乎士皆喜悉所有給之以洺州降

龍紀元年李克用大發兵遣李罕之李存孝攻孟方立拔磁洺州方立遣大將馬漑將兵數萬拒之大敗

乾寧三年朱全忠攻兗鄆李克用遣李存信將萬騎假道于魏以救朱瑄軍士侵掠魏境羅宏信伏兵攻之存信敗走洛州

光化元年三月朱全忠將葛從周取洛州斬刺史邢善

益三年八月克用取洛州全忠復遣從周擊洛州自鄴

縣度漳水營于黃龍鎮

金疆城圖永年有黃龍鎮明史永年西南有黃龍鎮

天祐十三年二月晉王存勗敗劉鄩軍四月克洛州

五代漢高祖起太原所在州鎮多殺契丹守將歸漢耶

律德光懼棄汴北歸至臨洛見井邑荒殘笑謂晉人曰

致中國至此皆燕王爲罪首又顧張礪曰爾亦有力焉

宋咸平二年冬十月契丹隆緒大舉寇掠邢趙那洺州
王德用爲邢洺磁相巡檢盜張洪霸聚衆界上州不能
捕德用以羶車載勇士詐爲婦人飾賊果來邀勇士奮
出悉擒之

靖康二年金陷河北諸郡趙士晤者濮安懿王曾孫從
二帝北遷次洺州東欲遁還謀未就而金人圍合士晤
走抵武安招集義兵夜薄城下力戰破圍入城治壕塹
樹鹿角勵將士死守飛大礮碎其攻具敵解圍去以功
遷權知洺州兼防禦使建炎二年金人再犯洺州糧盡
援絕衆奉士晤出城遂陷

建元二年宗澤上疏曰臣欲乘此暑月遣將渡河取懷
衛洛相等州分路並進山寨忠義之民相應者不啻百
萬臣當躬冒石矢爲諸將先中興之業必可立致黃潛
善等阻之

金興定三年命樞密遣官簡嶺外諸軍之武健者養彰
德邢洛衛濬懷孟等城諭田琢山西流民少壯者充軍
老幼者令就養邢洛等州欲趨河南者聽

正隆中洛州盜起無兵不能禦洛舊有河附于城下防
禦使伯德特離補令引水注濠以爲固盜不能近

元太祖八年癸酉秋分兵三道遣太子朮赤察合台窩

闢台爲右軍循太行而南取洺州十三年戊寅遣蒙古
不花略定河北入濟南嚴實籍所隸相魏磁洺等州戶
三十萬詣軍門降先是郡王帶孫攻洺不下木華黎遣
石天應拔之又有石抹孛迭兒者契丹人從奪忽闌闡
里必狗地山東洺州城守甚堅孛迭兒不避矢石率衆
先登功爲諸軍冠

明洪武元年閏七月徐達取河北遂下磁州進攻廣平
元平章周昱棄城遁

崇禎三年土寇掠郡城西遶而南至井兒寨賊騎二百
郡遣壯丁逐之被傷死者甚衆大名兵備盧象昇引軍

擊却之六年山西流賊入永年西徼川將馬鳳儀以部
檄駐臨洺因寇爲利散漫無部伍賊諜知之薄諸隘川
卒竊民衣物不忍棄戰敗死者二百人鳳儀被害巡撫
丁魁楚使孫游擊領兵千八百來援寇多衣婦人服傅朱
黑孫兵馬驚遂敗象昇親至洺慰諭士人鼓以忠義俾
結砦以守時人畜死傷腥穢觸人象昇親入寨撫慰龔
賊大敗之十一年歲饑盜起知縣宋祖乙開蓮花口引
滏河水衛城瀰漫堤內廣各數里敵騎前行至偵其險
歎息而去十五年有逃卒數百騎掠西鄉順廣道中軍
守備陳鎮彝率兵禦之遇于龔城村時鎮彝所將多步

卒賊先據險鎮彝與千總解靖方併力搏戰力盡皆死

賊亦大創去龔城立祠併祀之十六年城守邑紳申佳

允疏請挑外河以守關

臣家廣平府永年縣幅員雖小實爲畿南要害之區日者孤城

無恙固賴守令諸臣捍禦之力實恃環城一帶水爲之擁衛也城南五里許有滏陽河昔年守土者引之以護城垣汪洋浩瀚實亦奇觀關廂以外則坦然陸地矣比來民力已竭此時而議創築重城物力難繼惟有因水之勢而挑濬之不傷財不勞民庶幾事半功倍耳臣邑地狹民貧饑饉洊至斯時休養而生息猶恐其饑寒迫而流徙之念生卽此浚池一事斷不可派之民間又增一害也城以內計見任在籍鄉紳殷實舉監官裔每人各下田若干每田一頃應挑若干丈務極闊深宛成天塹接畝認工勤期課竣至若單荒下戶盡行豁免焉而此鄉紳舉監人等誰無父母妻子誰無身家性命知必慷慨樂趨決不忍隔膜坐視也關廂以外大堤以內亦如近垣水勢一望無涯異日卽有他虞附城屹然可恃關存而城益固鑿深而築益崇矣目今凶歲民饑借